

吳  
興  
藝  
文  
補

吳興藝文補卷之二目錄

宋

高祖

破姚泓表

爲扶風太守沈  
川子武康人

賜沈林子書

沈林子田子之弟

起沈林子詔

封沈林子詔

追贈沈林子詔

文帝

詔彭城王義康

爲沈邵武康人  
林子之子

答衡陽王義季

爲沈邵

與始興王濬詔

爲沈璞林子少子

別詔沈璞

賜沈亮詔

亮武康人林子之子

詔報沈亮創城府啓

詔答沈亮陳府事

以沈演之爲中領軍詔

沈演之武康人

詔蕭思話

爲沈演之

賜始興王濬書 爲沈懷遠武康人

孝武帝

封沈慶之等詔

沈慶之武康人沈法系慶之從弟

明帝

徙沈勃詔

沈勃武康人演之子

詔沈文秀

沈文秀武康人慶之弟子

詔沈攸之

攸之武康人

廢帝

封沈攸之詔

太后

問沈攸之令

賜攸之手令

江夏王

啓太祖

爲沈邵

詔答

始興王濬

吳興郡武康開漕疏

與沆璞疏

又教

與主簿顧邁孔道存書

爲沈璞

又與沈璞書

鄭鮮之

親疾去職議

爲沈叔任叔任武康人

傅亮

與沈林子書

丘珍孫

吳興人

與王僧達書

王僧達

答丘珍孫書

與沈璞書

丘淵之

烏程人

征齊記

沈演之

賀白鳩表

華林園嘉禾頌

沈亮

三吳救災議

發冢及遭劫不救議

啓太祖

陳太祖

籤世祖

沈慶之

鑄錢議

江夏王義恭

駁沈慶之鑄錢議

藝文補

卷之二

目次

四



顏竣

駁沈慶之鑄錢議

沈邵

贈安成王孚孝廉教

沈攸之

與武陵王贊牋

又

與蕭道成書

沈懷遠

懷文之弟

南越志

沈懷文

寂之孫懷遠兄

宋侍中趙倫之碑

省錄尚書議

沈慶之

與南郡王義宣書

王景文

書與王道隆

王道隆烏程人

吳興藝文補卷之二目錄終

吳興藝文補卷之二

烏程董斯張遐周彙編

閔元衢康侯叅輯

韓昌箕仲弓訂定

宋

破姚泓表

高祖

參征虜軍事振武將軍扶風太守沈田子率領勁銳背  
城電激身先士卒勇冠戎陳奮寡對衆所向必摧自辰  
及未斬馘千數泓喪旗棄衆奔還霸西咸陽空盡義徒  
四合清蕩餘燼勢在跂踵

賜沈林子書

高祖

初高祖爲太尉以林子爲參軍及伐羗林子參征西  
軍事悉署三府中兵加建武將軍統軍爲前鋒攻姚  
泓僞東平公姚紹于潼關紹退走還保定城留僞將  
軍姚鸞精兵守嶮林子銜枚夜襲屠其城而坑其衆  
高祖賜書

頻再破賊慶快無譬旣屢摧破想不復久耳

起沈林子詔

高祖

沈林子遭母憂還東葬乘輿躬率信使相望葬畢詔

曰

軍國多務內外須才前鎮西資議建威將軍河東太守  
沈林子不得遂其情事可輔國將軍起

封沈林子詔

高祖

建威將軍河南太守資中侯沈林子等或中規遠謀扶  
贊洪業或肆勤樹績弘濟艱難經始圖終勲烈惟茂並  
宜與國同休饗茲大賚林子可封漢壽縣伯食邑六百  
戶開國之制率遵舊章

追贈沈林子詔

高祖

故輔國將軍沈林子薨懷真審忠績允著才志未遂傷悼在懷可追贈征虜將軍

詔彭城王義康

文帝

沈邵襲駙馬都尉會彊弩將軍缺上詔義康沈邵人身不惡吾與林子周旋異常可以補選

荅衡陽王義季

文帝

沈邵爲義季右軍中兵參軍始興王濬初開後軍府以邵爲中兵義季在江陵安西府中兵久闕啟太祖求人上荅之其事不果

稱意才難得沈邵雖未經軍事既是腹心作鍾離郡及在後軍府房中甚修理或欲遣之

與始興王濬詔

文帝

沈璞除秣陵令以疾去職濬出爲南徐州太祖謂璞曰濬旣出蕃卿故當臥而護之與濬詔乃爲正佐沈璞累年主簿又經國卿雖未嘗爲行佐今故當正參軍耶若爾正當署餘曹兼房任不爾便宜行佐正署中兵恐於選體如不多耳

別詔沈璞

文帝

璞爲盱眙太守時王師北伐璞與臧質計拒虜虜主  
燾遁走太祖遣中使深相褒美又別詔

近者險惡老弱殊當憂迫耶念卿爾時難爲心想百姓  
流轉已還此遣部運尋至委卿量所贍濟也

賜沈亮詔

文帝

亮遷南譙王義宣叅軍太祖詔

陝西心膂須才故授卿此職

詔報沈亮創城府啟

文帝

啟之甚佳此亦由來常患比屢勅之猶復如此甚爲無



理近復令孟休宣旨想當不同卿比可密觀其優劇也

詔荅沈亮陳府事

文帝

前已令卿兄改革尋值遷回竟是不施行邪今更救西府也

以沈演之爲中領軍詔

文帝

總司戎政翼贊東朝惟允之舉匪賢莫授侍中領右衛將軍演之清業貞審詭思沈濟美彰出內誠亮在公能克懋厥猷樹績所蒞演之可中領軍

詔蕭思話

文帝

沈演之歷轉吏部尚書領太子右衛率時思話爲雍州刺史徵爲吏部尚書文帝詔之

沈尚書暴病不救其體業貞審立朝盡公年時尚可方相委任奄忽不永痛惋特深銓管要機通塞所寄丈人才用體國二三惟允

賜始興王濬書

文帝

始興王濬巫蠱事發文帝惋歎彌日謂潘淑妃曰太子圖富貴更是一理虎頭復如此非復思慮所及汝母子豈可一日無我耶濬小名虎頭使左右朱法喻

密責讓濬辭甚哀切并賜書曰

鸚鵡事想汝已聞汝亦何至迷惑乃爾且沈懷遠何人其詎能爲汝隱此耶故使法瑜口宣投筆惋慨

封沈慶之等詔

孝武帝

朕以不天有生罔二泣血千里志復深逆鞠旅伐罪義氣雲踊羣帥仗節指難如歸故曾未積旬宗社載穆遂以眇身猥纂大統永念茂庸思崇徽錫新除使持節散騎常侍都督南兗豫徐兗四州諸軍事鎮軍將軍南兗州刺史沈慶之寧朔將軍始興太守沈法系等或盡誠

謀初宣綜戎畧或受命元帥一戰寧亂或稟奇軍統協  
規効捷偏師奉律勢振東南皆忠國忘身義高前烈功  
載民聽誠簡朕心定賞策勲茲焉攸在宜列土開邑永  
蕃皇家慶之可封南昌縣公食邑三千戶法系平固縣  
侯食邑千戶

徙沈勃詔

明帝

沈勃琴書藝業口有美稱而輕躁耽酒幼多罪愆比奢  
淫過度妓女數十聲酣放縱無復劑限自恃吳興土豪  
比門義故脅說士庶告索無已又輒聽募將委役還私

託注病叛遂有數百周旋門生競受財貨少者至萬多者千金考計贓物二百餘萬便宜明罰勅法以正典刑故光祿大夫演之昔受深遇忠績在朝尋遠矜懷能無弘律可徙勃西垂令一思愆悔

詔沈文秀

明帝

皇帝問前督青州徐州之東莞東安二郡諸軍事建威將軍青州刺史朕去歲撥亂功振普天於卿一門特有殊澤卿得延命至今誰之力邪何故背國負恩遠同逆豎今天下已定四方寧一卿獨守窮城何所歸奉且卿

百口在都兼有墳墓想情非木石猶或顧懷故指遣文  
炳具相宣示凡諸逆節親爲戎首一不加臯文炳所具  
卿獨何人而能自立便可速率部曲同到軍門別詔有  
司一無所問如其不爾國有常刑非惟戮及弟息亦當  
夷卿墳壟旣以謝齊土百姓亦以勞將士之心故有今

詔

文炳文  
秀弟

詔沈攸之

明帝

攸之爲前將軍與索虜戰失利太宗復令進圍彭城  
攸之以淮泗旣乾糧運不繼固執以爲非往返者七

上大怒詔曰

云

攸之懼進軍行至遲墟上悔追軍

令反

卿春中求伐彭城吾恐軍士疲勞且去冬奔散人心未  
宜復用不許卿所啟今便不肯爲吾行耶卿若不行便  
可使吳喜獨去

封沈攸之詔

廢帝

車騎中兵參軍沈攸之誠畧沈果忠幹勇鷲消蕩氛翳  
首制鯨凶宜裂河山以酬勲義攸之可東興縣男

問沈攸之令

太后

攸之自擅闔外朝廷疑憚之累欲徵入慮不受命乃止羣臣稱皇太后令遣中使問攸之欲以觀察其意久勞於外宜還京輦然任寄之重換代殊爲未易還止之宜一以相委

賜沈攸之手令

太后

國家之事一以委公

啟太祖

江夏王義恭

沈邵爲鍾離太守有惠政義恭啟太祖徙盱眙不許盱眙太守劉顯真求自解詵邵往莅任有政績彰于民



聽若重授盱眙足爲良二千石

詔荅

其願還經年方復作此流遷必當大罔罔也

吳興郡武康開漕䟽

始興王潛

所統吳興郡衿帶重山地多汙澤泉流歸集䟽決遲壅  
時雨未過已至漂沒或方春輟耕或開秋沈稼田家徒  
苦防遏無方彼邦輿區地沃民阜一歲稱稔則穰被京  
城時或水潦則數郡爲災頃年以來儉多豐寡雖賑賚  
周給傾耗國儲公私之弊方在未已州民姚嶠比通便

宜以爲二吳晉陵義興四郡同注太湖而松江滬瀆壅  
噎不利故處處涌溢浸漬成災欲從武康紆溪開漕谷  
湖直出海口一百餘里穿渠浚必無閼滯自去踐行量  
度二十許載去十一年大水已詣前刺史臣義康欲陳  
此計卽遣主簿盛曇泰隨嶠周行互生疑難議遂寢息  
旣事關大利宜加研盡登遣議曹從事史虞長孫與吳  
興太守孔山士同共履行准望地勢格評高下其川源  
由歷莫不踐較圖畫形便詳加竿考如所較量決謂可  
立尋四郡同患非獨吳興若此滄獲通列邦蒙益不有

暫勞無由永晏然興創事大圖始當難今欲且開小漕  
觀試流勢輒差烏程武康東遷三縣近民卽時營作若  
宜更增廣尋更列言昔鄭國徵將史起畢忠一開其說  
萬世爲利嶠之所建雖則芻蕘如或非妄庶幾可立

與沈璞疏

始興王濬

濬爲揚州刺史璞爲主簿嘗爲舊宮賦久而未畢濬  
與璞疏璞因事陳荅辭義可觀濬重下教又與主簿  
顧邁孔道存書

卿常有速藻舊宮何其淹耶想行就耳

又教

始興王濬

卿沈思淹日向聊相敦還白斐然遂無紙翰昔曹植有  
言下筆成章良謂逸才瞻藻誇其辭說以今況之方知  
其信執省躊躇三復不已吾遠慚楚元門盈申白之賓  
近愧梁孝庭列枚馬之客欣惡交至諒惟深矣薄因末  
牘以代一面

與主簿顧邁孔道存書

始興王濬

沈璞淹思踰歲卿研慮數旬瓌麗之美信同在昔同聊  
問之而還荅累翰辭藻豔逸致慰良多旣欣股肱備跪

髦楚還慚予躬無德而稱復裁少字宣志于璞聊因尺  
紙使卿等具知厥心

又與沈璞書

始興王濬

狡虜狂凶自送近服僞將卽斃酋長傷殘實天威所喪  
卿諸人忠勇之効也吾式遏無素致境蕪民瘠負乘之  
愧允當其責近乞退謝愆不蒙垂許故以報卿

親疾去職議

鄭鮮之

時新制長史以父母疾去官禁錮三年山陰令沈叔  
任父疾去職鮮之因上此議從之於是自二品以上

父母沒者墳墓崩毀及疾病族屬輒去並不禁錮

夫事有相權故制有與奪此有所屈而彼有所申未有理無所明事無所獲而爲永制者也當以去官之人或容詭託之事詭託之事誠或有之豈可虧天下之大教以未傷本者乎且設法蓋以衆苟寡而不以寡違衆况防杜去官而塞孝愛之實且人情趨于榮利辭官本非所防所以爲其制者在官不久則奔競互生故杜其欲速之情以申考績之實省父母之疾而加以室養悌義疾理莫此爲大謂宜從舊于義爲允

與沈林子書

傅亮

高祖踐阼封林子漢壽縣伯固辭不許亮與林子書  
班爵疇勲歷代常典封賞之發簡自帝心主上委寄之  
懷實叅休否誠心所期同國榮戚政復是卿諸人共弘  
建內外足下雖存挹退豈得獨爲君子邪

與王僧達書

丘珍孫

聞褚先生出居賢館此子滅景雲棲不事王侯抗高木  
食有年載矣自非折節好賢何以致之昔文舉棲治城  
安道入昌門於茲而三焉夫却粒之士淪霞之人乃可

覽致不宜久羈君當思遂其高步成其羽化望其還策  
之日覽紆清塵亦願助爲譬說

荅丘珍孫書

褚先生錢塘  
褚伯玉也

王僧達

褚先生從白雲游舊矣古之逸民或畱慮兒女或使華  
陰成市而此子索然惟朋松介石於孤峰絕嶺者積數  
十載近故要其來此冀慰日夜比談討芝桂借訪荔蘿  
若已窺煙液臨滄洲矣知君欲見之輒當申譬

與沈璞書

王僧達

足下何如想館舍正安士馬無恙離析有時音旨無日



憂詠沈吟增其勞望閒者獺獫扈橫掠剝邊鄙鄙販絕  
塵坳介靡達瞻江盼淮眇然千里吾聞涇陽梗棘伊滑  
荐遁烏集絃絕患深自古承知乃背冠告城境勝胃朝  
食伍甲冑舍烽鼓交警羽鏑駢合而足下祗兵礪伍總  
厲豪彥師請一奮氓無貳情遂能固孤城覆嚴對陷灰  
地覲生光古之田孫何以尙茲商驛始通粗知梗槩崇  
讚膽智嘉賞文猛甚善甚善吾近以戎鼎橫斥規効情  
命收龜落簪星舍京里旣獲遄至胡馬卷迹支離鬻德  
復繼前緒行葦之懽實協初慮但乖塗重隔顧增慨涕

比恒疾卧憂委兼疊裁書送想無斃久懷

征齊記

丘淵之

淵之有文章新集錄載世說劉孝標法僅紀名氏無  
復事實故不述裴松之三國志注別有文章叙多清  
綺之辭以不著淵之名恐別出荀勗摯虞手淵之集  
梁十五卷隋七卷唐世僅存五卷談鑰志以爲有集  
百卷今所存惟此耳

泰山東岳也瀛博二縣共界漢武封禪割此縣以供祀  
泰山故曰奉高三十里有延陵兒塚本云其高可隱今

乃二丈餘但是後人培之

朱靈城東有管寧舊宅前有水是寧嘗所澡浴處

城北十五里有柳泉符朗常以爲解禪處

### 賀白鳩表

沈演之

臣聞貞裕之筭介於盛王休瑞之臻罔違哲后故鳴鳳  
表垂衣之化翔鶴徵解網之仁陛下道德嗣基聖明繼  
世教清鳥紀治昌雲官禮漸同川澤浹禾微天嘉明懿  
民樂薰風星辰以之炳煥日月以之光華神圖祇緯盈  
觀闕序白質黑章充牣靈囿應感之符畢臻而因心之

祥未屬以素鳩自遠毼翰歸飛資性閑淑羽貌鮮麗既  
聞之先說又親覩嘉祥不勝藻抃上頌一首辭不稽典  
分乏采章愧不足式昭皇慶崇讚盛美蓋率輿誦備之  
篇末其頌曰有哲其儀時惟皓鳩性總五教名編素丘  
殷曆方昌婉翹來游漢錄克韓爰降爰休其於顯盛宋  
獻慶遐傳聖皇在上道照鴻軒稱施旣平孝思永言人  
和於地神豫於天其禮樂孔秩靈物咸昭白雀集苞丹  
鳳棲郊文騶儷跡嘉穎擢苗灼灼編羽從化馴朝其豈  
伊赴林必周之栩豈伊歸義必商之所惟德是依惟仁

是處育景陽嶽濯姿帝宇

其四

刑曆頒興理感迭通雉飛

越裳鷺起西雖烝然戾止實兼斯容壹茲民聽穆是王

風

其五

華林園嘉禾頌

沈演之

煥炳禎暉昭晰瑞典運傾方闕時亨始顯綈狀旣章鳥

文斯辯於皇聖辟承物紀遠明兩辰麗昌輝天衍

其理一

妙位崇事神業盛淵渥德澤虛寂道政協化安心調樂

移性玉衡從體瑤光得正巨星垂采景雲立慶

其二

極仁

所被罔幽不穰至和所感靡沉弗彰篤出丹穴鸚出西

湘白鹿踰海素鳥越江結響穹陰儀形鐘陽其治人奉

天廼勤廼格黛未俶載高廩已積嘉禾重穆甘露流液

擢秀辰畦揚穎角澤離穗合豪榮區蔭斥其盈箱徵殷

貫桑表周今我大宋靈貺綢繆帝終撫謙繹思勿休躬

薦宗廟溫恭率由降福以誠孝享虔羞其頌社推功登

徽祿詔恩覃隱顯賞延荒微河濂海夷山華岳耀憬琛

賁蕪澤委效日表地外改服請教其茂對盛時綏萬

屢豐猷猷歸素秩秩大同上藏諸用下知所從仰式王

度俯歌南風鴻名稱首永保無窮其七

三吳救災議

沈亮

沈亮轉西曹主簿時三吳水淹穀貴民饑刺史彭城王義康使立議以救民急亮議

東土災荒民凋穀踊富民蓄米日成其價宜班下所在隱其虛實令積蓄之家聽留一年儲餘皆勒使羅貨爲制平價此所謂常道行於百世權宜用於一時也又緣淮歲豐邑富地穰麥旣已登黍粟行就可折其估賦仍廣交市三吳饑民卽以貸給使強壯轉運以贍老弱且酒有喉脣之利而非食餌所資尤宜禁斷以息遊費

發冢及遭劫不救議

沈亮

世祖出鎮歷陽行參征虜軍事民有盜發冢者罪所  
近村民與符伍遭劫不赴救同坐亮議

尋發冢之情事止竊盜徒以侵亡犯死故同之嚴科夫  
穿掘之侶必銜枚以晦其迹劫掠之黨必謹呼以威其  
事故赴凶赫者易應潛密者難且山原爲無人之鄉丘  
壠非恒塗所踐至於防救不得比之村郭督實效名理  
與劫異則符伍之坐居宜降矣又結罰之科雖有同符  
伍之限而無遠近之斷夫冢無村界當以比近坐之若



不域之以界則數步之內與十里之外便應同罹其責  
防民之禁不可頓去止非之憲宜當其律愚謂相去百  
步同赴告不時者一歲刑自此以外差不及罰

啟太祖

沈亮

亮轉西曹主簿啟太祖陳府事

伏見西府兵事或年幾八十而猶伏隸或年始七歲而  
已從役衰耗之體氣用湮徵兒弱之軀肌膚未實而使  
伏勤昏稚驚苦傾晚於禮既薄爲益實輕書制休老以  
六十爲限役少以十五爲制若力不周務故當粗存優

減

陳太祖

沈亮

時營創城府功課嚴促亮又陳之

經始城宇莫非造創基築既廣夫課又嚴不計其勞苟務其速以歲月之事求不日之成比見役人未明上作閉鼓乃休呈課既多理有不逮至於息日拘備關限方涉暑雨多有死病頃日所承亦頗有逃逸竊惟此旣內藩事殊外鎮撫蒞之宜無繫早晚若得少寬其工課稍均其優劇徒隸旣苦易以悅加考其卒功廢闕無幾臣

聞不居其職不謀其事庖割有主尸不越樽豈臣疎小  
所當預議但臣泳恩歲厚服義累世苟是所懷忘其常  
體

籤世祖

沈亮

亮爲南陽太守郡界有古時石碣蕪廢歲久亮籤世  
祖修治之

施生興業首教農畝立民崇政訓本播穡故能殷邦康  
俗禮節用成頃北洛侵蕪南宛彫毀儉恥肆凶犬夷猶  
疆遠肅烽驛近虞郊閉遂使沃衍弗井巨防莫修窘力

輟耕闕於分地凶荒無待流冗及今禮化孚內威禁清  
外斯實去盜修畝昭農緒稼之時弘圖廣務拓土祈年  
之日殿下降心育物振民復古且方提封榛棘綏入殊  
荒竊見郡境有舊石竭區野腴潤實爲神臯而蕪決稍  
積久廢其利凡管所見謂宜創立昔文翁守官起沃成  
產偉連撫民開興增業惠昭二邦庸列兩溪雖効政圖  
功下見所絕聯事惟忝憂同職同

後缺

鑄錢議

沈慶之

昔秦幣過重高祖是患晉令民鑄改造榆莢而貨輕物

重又復平時太宗放鑄賈誼致譏誠以采山術存銅多  
利重耕戰之詭曩時所用四民競造爲害或多而孝文  
弗納民鑄遂行故能朽貫盈府天下殷富況今耕戰不  
用采鑄廢久鎔冶所資多因成詘功艱利薄絕吳鄧之  
資農民不習無釋耒之患方今中興開運聖化惟新雖  
復偃甲銷戈而倉庫未實公私所乏惟錢而已愚謂宜  
聽民鑄錢郡縣開置錢署樂鑄之家皆居署內平其雜  
式去其雜僞官歛輪郭藏之以爲永寶去春所禁新品  
一時施用今鑄悉依此格萬稅三千嚴檢盜鑄并禁剪

鑿數年之間公私豐贍銅盡事息姦僞自止且禁鑄則銅轉成罷開鑄則罷化爲財翦華利用於事爲益

駁沈慶之鑄錢議

江夏王義恭

伏見沈慶之議聽民私鑄樂鑄之室皆入署居平其準式去其雜僞愚謂百姓不樂與官相關由來甚久又多  
是人士蓋不願入署凡盜鑄爲利利在僞雜僞雜旣禁  
樂入必寡云歛取輪郭藏爲永寶愚謂上之所貴下必  
從之百姓聞官歛輪郭輪郭之價百倍大小對易誰肯  
爲之彊制使換則狀似逼奪文去春所禁新品一時

周愚謂此條在可開許又云今鑄宜依此格萬稅三千  
又云嚴檢盜鑄不得更造愚謂禁制之設非惟一旦昧  
利犯憲群庶常情不患制輕患在冒犯今入署必輸萬  
三千私鑄無十三之稅逐利犯禁居然不斷又云銅盡  
事息姦僞自禁愚謂赤縣內銅非可卒盡比及銅盡姦  
僞已積又云禁鑄則銅轉成器開鑄則器化爲財然頃  
所患患於形式不均加以翦鑿闕 鈔錫衆斫耳若止  
於盜鑄銅者亦無須苦禁

又

顏竣

泉貨利用近古所同輕重之議定於漢世魏晉以降未  
之能改誠以物貨既均改之僞生故也世代漸久弊運  
頓至因革之道宜有其術今云開署放鑄誠所欣同但  
慮採山事絕罷用日耗銅既轉少罷亦彌貴設罷直一  
千則鑄之減半爲之無利雖令不行又云去春所禁一  
時施用是欲使天下豐財若細物必行而不從公鑄利  
已旣深情僞無極私鑄剪鑿書不可禁五銖半兩之屬  
不盈一年必至於盡財貨未贍大錢已竭數歲之間悉  
爲塵土豈可令取弊之道基於皇代今百姓之貨雖爲



轉少而市井之民未有嗟怨此新禁初行品式未一須  
臾自止不足以垂聖慮惟府藏空匱實爲重憂今縱行  
細錢官無益賦之理百姓雖瞻無解官乏惟簡費去華  
設在節儉求贍之道莫此爲貴然錢有定限而消失無  
方剪鑄雖息終致窮盡者亡應官開取銅之署絕器用  
之塗定其品式日月漸鑄歲久之後不爲世益耳

贈安成王孚孝廉教

沈 邵

邵爲安成相在郡以寬和恩信爲南土所懷郡民王  
孚有學業志行見稱州里邵在任未幾而孚卒邵贈

以孝廉板教曰

前文學主簿王孚行潔業淳棄華息兢志學修道老而彌篤方授右職不幸暴亡可假孝廉檄薦以特牲緬想延陵以遂永懷

與武陵王贊牋

沈攸之

江陵一總八州地居形勝鎮撫之重宜以上歸本欲仰移節蓋改臨荆部所以未具上聞者欲待至止面自咨申不圖重關擊櫺覲接莫由若使匡朝之誠終蔽於聖察襲遠之舉近攤於郢都則無以謝烈士之心何用塞

義夫之志便不犯關陵漢期一接奉若夫斬蛟陷石之  
卒製骼卷鐵之將煙騰颯迅容或驚動左右苟不獲已  
敢不先布下情

又

沈攸之

下官位重分陝富兼金穴子弟勝衣爵命已及親黨辨  
菽抽序便加耳倦絃歌厭梁肉布衣若此復欲何求  
豈不知俛首苟安保養餘齒何爲不計百口甘冒危難  
誠感歷朝之遇欲報之於皇室爾昧理之徒謂下官懷  
無厭之願旣貫誠於白日不復明心於殿下若使天必

喪道忠節不立政復闔門碎滅百死無恨但高祖王業  
艱難太祖劬勞日昃卜世不盡七百之期宗社已成他  
人之有家國之事未審於聖心何如

與蕭道成書

蕭答書  
不錄

沈攸之

吾聞魚相忘於江湖人相忘於道術彼我可謂通之矣  
大明之中謬奉聖主忝同侍衛情存并閤義著斷金乃  
分帛而衣等糧而食值景和昏暴心燭形焦若斯之苦  
寧可言盡吾自分碎首於閣下足下亦懼滅族於舍人  
爾時磐石之心旣固義無貳計蹶迫時難相引求全天

道粹善此理不空結姻之始實關于厚人而帝寵  
人皆爲鬼矣吾與足下得蒙大造親過夙眷遇  
錄其心迹復忝驅使臨崩之日吾豫在遺托加榮受寵  
恩深位高雖復情謝古人粗識忠節誓心卽報期之必  
歿此誠志竟未申遂先帝登遐微願永奪自爾已來與  
足下言面始絕非惟分張形迹自然至此脫枉一告未  
嘗不對紙流涕豈願相誚于今哉苟有所懷不容不白  
初得賢子諱疏云得家信云足下有廢立之事安國寧  
民此功巍巍非吾等常人所能信也俄奉皇太后假令

云足下潛構深畧獨斷懷抱一何能壯但冠雖敝不可承足蓋其尊高故耳足下交結左右親行殺逆以免身患卿當謂龍逢比干癡人耳凡廢立大事不可廣謀但袁褚遺寄劉又國之近戚數臣地籍實爲膏腴人位並居時望若此不與議復誰可得其披心胸者哉昏明改易自古有之豈獨大宋中屯耶前代盛典煥盈篇史請爲足下言之羣公共議宜啟太后奉令而行當以王禮出第足下乃可不通大理要聽君子之言豈可罔滅天理一何若茲孝經云資于事父以事君縱爲宗社大計

不爾寧不識有君親之意耶乃復慮以家爲暗以爵賞  
小人無狀遂行弑害吾雖寡識竊從古比豈有爲臣而  
有近日之事耶使一旦荼毒身首分離生自可恨歿者  
何罪且有登齋之賞此科出於何文凡在臣隸誰不惋  
歎華夷叩心行路泣血乃至不殯使流蟲在戶自古以  
來此例有幾衛國微小故有弘演不圖我宋獨無其人  
撫膺惆悵不能自己足下與向之殺者何異人情易反  
還成嗟悲爲子君者無乃難乎蹊田之譬豈復有異管  
仲有言君善未嘗不諫足下諫諍不聞甘崔杼之罪何

惡逆之甚昔太甲還位伊不自疑昌邑之過不可勝數  
霍光荷託尙共議于朝班然後廢之猶有湯沐之施論  
者不以劫主爲名桓溫之心未忘于篡海西失道人倫  
頓盡廢之以公猶禮處之當溫彊盛誰能相抗尙畏懼  
于形迹四海不愜未嘗有樂推之者伊尹霍光名高于  
臣節桓氏亦得免于脅奪凡是諸事布于書策若此易  
曉豈待指掌卿常言比迹夷叔如何一旦行過桀跖耶  
聖明啟運蒼生重造晉天率土誰不歌抃實是披心罄  
節奉公忘私之日而卿大收宮妓劫奪天藏器械金寶



必克私室移易朝舊布置私黨披甲入殿內外宮閣管  
籥悉關家人吾不知子孟孔明遺訓如此王謝陶庾行  
此舉止且朱方帝鄉非親不授足下非國戚也一旦專  
縱自樹云是兒守臺城父居東府一家兩錄何以異此  
知卿防固重複猜畏萬端言以禦遠實爲防內若德允  
物望夷貉猶可推心共處如其失理乖道金城湯池無  
所用也文長以戈戟自衛何解滅亡吳起有云禮義不  
修舟中之人皆讎也足下旣無伍員之病苟懷貪慝而  
有賊宋之心吾寧捐申包之節邪聞求忠臣者必出孝

子之門卿忠孝于斯盡矣今竊天府金帛以行奸惠盜  
國權爵以結人情且授非其理合我則賞此事已復不  
可恒用用之旣訖恐非忠策且受者不感識者不知不  
能遏姦折謀誠節慨惋隔硤數千無因自對不能知復  
何情顏當與足下叙平生舊款吾聞前哲絕交不出惡  
言但此自陳名節于胸心因告別于千載放筆增歎公  
私潛淚想不深怪狂言然天下耳目豈伊可誣抑亦當  
自知投杖無疆爲必先及

南越志

沈懷遠

懷遠志南越見隋書陳振孫亦載其目蓋宋世猶有  
存者余從諸書錄之其書則劉昭氏釋道世氏徐堅  
氏區陽詢氏虞世南氏李善氏李昉氏曾慥氏陶九  
成氏李時珍氏

衢按他書散見  
不能備舉其名

尉佗之時有五色羊以爲瑞因圖之府廳

高涼本合浦縣也吳建安十六年衛毅錢博拒步騭高  
安峽殺水歟博與其屬亡于高涼呂岱爲刺史博旣請  
降遂以博爲高涼郡尉于是置郡焉

郢故楚都在南郡

越之市名爲虛多在村場先期招集各商或歌舞以來  
之荆南嶺表皆然蓋市之所在有人則滿無人則虛嶺  
南村市滿時少虛時多故謂之虛

軍安縣女子趙姬嘗在山中聚結羣黨攻掠郡縣著金  
箱齒屐恒居象頭鬪戰

日南至月立表望之日在表北景居南

雷州陰晦之夕謂之雷耕曉視田中必有開墾之迹

熙安間多颶風颶風者具四方之風也常以五六月發

未至時鷄犬爲之不鳴

颶音具

昔有溫氏媼者端溪人也居常澗中捕魚以資日給忽  
於水側遇一卵大如斗乃將歸置篋中經十日許有一  
物如守宮長尺餘穿卵而出因任其去留稍長尺五便  
能入水捕魚日得十餘頭稍長二尺許得魚漸多常游  
波中縈回媼側媼後治一溪斷其尾遂遂巡而去數年  
乃還媼見其輝色炳耀謂曰龍子今復來也因盤旋游  
戲親馴如初秦始皇聞之曰此龍子也朕德之所致畱  
使者以玄珪之禮聘媼媼戀土不以爲樂至始興江去  
端溪千餘里龍輒引船還不踰夕至本所如此數四使

者懼而止卒不能吞媼媼殞瘞于江陰龍子嘗爲大波  
至墓側策浪轉沙以成墳人謂之掘尾龍今人爲船爲  
龍掘尾卽此也

嶺嶺夏風發自午至夜乃止什屋僵樹累年一發或歲  
再三

秦二世時五星會于南斗南海尉任囂曰秦方長亂此  
南越偏霸之象也遂有志焉病且歿召真定人趙佗行  
南海尉事故今呼爲尉佗漢高帝遣陸賈立爲南越王  
佗獻白璧一雙翠鳥千犀角十紫貝五百桂蠹二龍生

翠二隻孔雀二隻

十月一日闕中風俗皆作糲糲或作京餽以祀先祖蓋告冬之義也

秦時中宿縣十里外有觀亭江神祠壇甚靈異中宿縣民至洛及路見一行旅寄其書云吾家在觀亭亭廟前石間有懸藤卽是也君至叩藤自有應者歸者如其言果有二人從水中出取書而淪尋還云江伯欲見君此人不覺隨去便覩屋宇精麗飲食鮮香言語接對無異世間今俗咸言觀亭有江伯神也

先是交趾之地頗爲膏腴徙民居之始知播殖厥土維壤厥氣維雄舊有君長曰雄王其佐曰雄侯其地曰雄田其民曰雄民分其地以爲雄將後蜀王將兵三萬討雄王滅之以其子爲安陽王治交趾其城九重周九里士庶蕃富尉佗在番禺遣兵攻之安陽王有神人曰臯通輔佐之造弩一張一放殺越軍萬人三放殺三萬人佗知其故便却壘息卒還戍武寧遣其次子始爲質通好後安陽王遇臯通不厚通去之王之女曰嬌珠見始丰姿閑美遂私焉始後誘嬌珠求觀神弩之妙嬌珠示



之因毀其機卽馳使報佗復興師襲之軍至安陽王又如初放弩弩敗師皆崩散遂破之安陽王啣生文犀入水走水爲之開越遂毀其地

牛女之分楊州之末土也爰有太山實曰秦望又有石竇峻起壁立內有金簡玉字夏禹得之以知百川之理也

蕭連山西十里有靈州山焉其山平原彌望一野極目  
番禺縣有番禺二山因以爲名

羅浮山有石樓左帶牛嶺山右據龍尾山

綏安縣北有連山多檉松杞梓昔越王建德伐木爲舡

其大千石以童男女三十人牽之旣而入船俱墜于潭

時聞附船有唱喚督進之聲往往有青牛馳廻與船俱

蓋神靈之至

一本云伐吳得牛其大千石又附船云云一本云附船有騏然之聲

高安石室自生風煙南北二門狀若人功意者以爲僊

都

自生上一本有有雲霧二字

高要有竦石廣六十餘丈高二百許仞土人謂之嵩臺

盆允縣利山上多香林

寧浦郡東南有蘓摩嶠屈璆

馬援鑿通九真山又積石爲坻以遏海波由是不復過漲海

馬鞍山始皇朝望氣者云南海有五色氣遂發卒千人鑿之以斷山之岡阜謂之鑿龍今所鑿之處形如馬鞍故名焉

黔安縣東南有圓岡高數十丈岡西面爲羊腸道說者云尉佗登此望漢而朝宗故曰朝漢臺

又有羅浮洲是爲浮山葛稚川避地於此遂採栖僊之鍾浮山亦蓬萊之一島也浮海而至故曰浮

一本云本只羅山因海上有山浮來相合故曰羅浮山

長沙郡瀏陽縣東有王喬山山有合丹竈

羅浮山高三千六百丈周回三百餘里嶺十五峯三十二其峯之秀者曰飛雲玉鵝錦繡玳瑁飛雲峯路側有梅花村

番禺北有芝蘭湖旁多人家其流南注西海

廬陵城中有井半清半黃者甜滑宜作粥色如金似灰汁甚芬馨

石門之水俗云經大庾則清穢之氣分飲石門則緇素之質變卽吳隱之酌飲之所也

海安縣有小水南注于海極目滄嶼渺望洪波

洪一作溟

遂成縣低山銀沙自出

一本云丹城縣有金塘金沙自此而出

波羅基國出鋼珠卽照幽夜

端溪俚人岑班入山遇一寶珠徑五寸取還夜光明照燭俚人甚懼以火燒之雖小損猶照一室

海中有大珠明月珠水精珠

珠有九品大五分以上至一寸八九分爲大品有光彩

一邊小平似覆釜者名璫珠璫珠之次爲走珠走珠之次爲滑珠滑珠之次爲礫硃礫硃之次爲官雨珠官雨珠之次爲稅珠稅珠之次爲慈符珠

水難金翅鳥口結沫所成碧色珠也大秦上人珍之

熙安縣山下有神鼎天清水澄則見鼎刺史劉道錫常使繫其耳而牽之耳脫而鼎潛旣而執紉者莫不疾耳蓋尉佗之鼎

江南之洲上有盧循城開曠明遠有蓬萊方丈之氣登者莫不洗心澄慮洲東有荔枝洲有人採石莫不繫石

英是也

菖蒲澗昔交州刺史陸胤之所開也至今重之每旦輒  
傾州連汲以充日用雖有井泉不足食大元中襄陽羅  
友累石澗側容百許人坐遊之者以爲洗心之域咸安  
中姚成甫嘗採菊澗側遇一丈夫謂成甫曰此澗菖蒲  
昔安期生所餌可以忘老於是徊翔俯仰倏然不知所  
終蓋仙者焉

管音遼城縣出管石卽滑石也又呼冷石土人以爲燒甃  
以爲烹魚

衡陽湘鄉縣有石魚山下多玄石石色黑而理若雲母  
發開一重輒有魚形鱗鱗首尾宛若刺畫長數寸魚形  
備足燒之作魚膏腥因以名之

龍川嘗有銅弩牙流水皆以銀黃雕鏤取之者祀而  
後得有取此牙逢風雨卽時淪沒父老云越王弩管處  
也

龍川縣營崗北有巨鑊恒有懸泉注之終歲不滿嘗有  
採薪者欲推動之忽然震電迷失路十許日乃至家  
南海以鰕頭爲盃鬚長數尺金銀鏤之晉康州刺史常



以杯獻簡文用以盛酒未及飲無故酒躍于外時廬江  
太守曲安遠頗解術數卽令筮之安遠曰卽三旬後庭  
將有喜慶者

一云將有告變者果  
有生乎人面六身

廬安縣白蜀里多楊梅張公以爲名章則多楊梅此偶  
以所聞而命書後好事改地就之耳求之白蜀去之遠  
矣

綠寧白水山多漆樹高十餘丈刺漆常上樹端雞鳴日  
出之始便刺之則有所得過此時陰氣淪陽氣升則無  
所獲也凡刺漆別有氏族以爲業膺前緣木處胼胝如

人腳也

蒼苔澁亦謂之過羅

南海江甌間有廬頭木葉如甘蔗織以爲帆以其踈暢懷風故帆不以布

威寧縣有穿州其上多綸木似穀皮可以爲綿

沙麻竹人削以爲弓弓似弩淮南所謂箠子弩也或曰蘓麻竹或曰蘓麻竹

石尊似蓴菜色青

博羅縣東蒼州足簾竹銘曰簾竹既大薄且空節長一

丈直如松

一本又云詳其竹直二丈猶爲筍而可食

廣州有樹可以禦火山北謂之慎火或謂之戒火多種屋上以防火也但南中無霜雪故成樹

寧鄉縣草多卷施拔心不灰江淮間謂之宿莽

博羅縣有合成樹十圍去地二丈分爲三衢東向一衢木累似縲子如橄欖而硬削去皮南人以爲櫟南向一

衢橄欖西向一衢三丈三丈樹嶺北之候也

三丈亦果名

山有精舍其草多芳杜木多椅松東有甘泉上有古樹榕藤繞之號榕樹

大禹取藤根爲糧饑年人常餌之故名禹餘糧

寧鄉縣多沙棠

海藻一名海苔或曰海羅

猴菜色赤生石上南越謂之鹿角

藿香形如都梁可以着衣巾中

交州有密香樹欲取先斷其根經年後外皮朽爛木心  
與節不壞堅黑沉水者卽沉香也半浮半沉與水面平  
爲鷄骨最麤者爲棧香此三物同出一樹有精粗之異  
耳並采無時

麒麟竭是紫鉤樹之脂也欲驗真僞但嚼之不爛如蠟者爲真

羅浮山生竹皆大七八圍節長一二丈謂之龍鍾竹

宋昌縣有棘竹長十尋大如甕其間短者輒六七丈也爲竹叢薄葉下有鉤刺或在條末如苙針也里人取以爲弓

豫章俞益期性氣剛直不下曲俗容身無所遠適在南  
真韓康伯書曰惟檳榔樹最南游之奇觀子旣非常木  
亦特異余在交州時度之大者三圍高者九丈餘葉聚

端房棲葉下華秀房中子結房外其擢穗似黍其綴  
實似穀其皮似桐而厚其節似竹而概其中空其外勁  
其屈如覆虹其伸如縋繩本不大末不小上不傾下不  
斜調直亭亭千百若一步其林則寥廓庇其蔭則蕭條  
信可以長吟可以遠想矣但性不耐霜不得北植必當  
遐立海南遼然萬里不遇長者之目自令人深恨

衢按齊民要術亦載此書數字微異

古度樹一呼椰子南人號曰柁

日亞反

不華而實實從木

皮中出如綴珠璫其實大如櫻桃黃卽可食過則實帶

化蛾飛出亦有爲政子者

續遊草藤也一曰諾勝一曰水藤山行渴則斷取汁飲之治人體有損絕冰則長髮去地一丈斷之輒更生根至地永不死

蕉布之品有三有蕉布有竹子布又有葛焉

桂州出古終藤結實如鵝毳核如珠珣治出其核紡其絲綿染爲斑布

青桐華頗似木綿而輝薰過之

疏麻大二圍高數丈四時結實無衰落

零陵香一名燕草又名薰草生零陵山谷葉如羅勒

青城縣多鷄鷄鷄者山鷄也利距善鬪世以家鷄鬪之則可擒也光色鮮明五采炫耀

江鷗一名海鷗在漲海中隨潮上下常以三月風至乃還洲嶼生卵似鷄卵色青頗知風雲若羣至听必風漁人及渡海者皆以此爲候

化蒙縣祠山上有潮潮中有泉鵲如今野鵲弄吭山泉號爲泉鵲

一云山上有池池中有松是如今野是棲息松間故



俗謂之松鳧

義寧縣北山多孔雀爲鳥不必匹合止以音影相掠便有孕亦與蛇偶一云雌見雄而有子

掠一作接

鷓鴣鳥雖復東西廻翔開翅之始必先南翥其鳴自呼

杜薄州

開翅一作命翻

海中有文魮鳥頭尾鳴似磬而生玉

高興縣有容鷄其形似鷄而五彩至則年穰

長鳴鷄鷄冠四開如蓮華鳴聲清澈贊曰翠冠續宮

碧距麗陳就昏別夕望旭驚晨

開寧縣多晨鵠

增城縣多白鵲大如鳩素質凝暎

鵲或作雀

蒙驩一名越王鳥

鷓鴣自呼其名向日而飛飛數隨月蓋若正月一飛而止

象牙長一丈餘脫其牙則深藏之削木代之可不爾窮其主得乃已也

平定縣東拒海有驊馬似馬牛尾一角

有鼠毋獸高三尺尾如杖如狼有乳聲似嬰兒出則殺

稼傲

甌鼠似鼯鼠長洞地穴飲泉噬竹

漢時交趾有犀奔至高涼人以黑牛舐之有識者曰此  
玄犀也

高州巨海中出離水犀似牛其出入有光水爲之開

昔有懶婦睡機上姑怒之遂走投水爲懶婦獸一枚可  
得脂三四斛然之照紡績則暗照歌舞則明習懶之性  
不革也今安平七源等州峒俱有狀如山猪而小喜食  
苗田夫以杼軸之類掛於田頭則不敢復近

鮫魚鯉也形如蛇而四足腹圍五六寸頭似蜥蜴鱗如  
鎧甲

蝦鰭長五丈尾似蝦

海魚無鱗形類琵琶一名樂魚其鳴亦嘉聞音出聽曾  
識瓠巴

含光一名黃臘魚頭嘴長而鱗背金色南人鑿爲炙雖  
美而毒或煎燂或乾夜卽有光如燭

石魚形圓如七寸拌

鼠魚頭似鼠

鱸鰣生山曲之間穴地爲窟泉源踊則此魚出今蘆令以南至於南州有焉俗以爲醬

海間育水母東海謂之蚝

音蜡

真魚如織絲魚饋尾魚有毒一名龜魚

織杼魚如真魚背上正青

鱣鱓

子林反

屬也長鼻輭骨長數丈而骨可啖似黃鱸而

長鰓魚左右如鐵鋸三牙魚似石首或曰雄石首也

龜甲一名神屋出南海生池澤中吳越謂之元作神龍

大如拳而色如金上甲兩邊如鋸齒水至利而能緣大

木捕鳴蟬至美可食不中于下以其小故也涪陵大龜

文似璚瑁俗號曰靈龜

竹當作緒

鰮魚南越謂爲壞雷魚通身黑長二丈子朝出食暮還  
毋腸腸從臍中入旦從口中出腹裏有兩洞腸貯水以  
養子腸容二子兩腸則四子也其腮鱗皮有珠文可以

飾刀劍口

一云烏鰮魚

鱗魚鼻有橫骨如轆海中波浪爲之蒲海船逢之必斷  
寄魚長三寸似白魚常附海船以濟洪波一曰寄載魚  
君魚長三寸背上骨如筆管大者似口逢諸細魚及鼉

皆斷之

漢有五侯鯖君臣鯖父子結盟人至共爲之餐

海中多朱鼈狀如肺有四眼六腳而常吐珠見則天下大旱

烏賊魚有石遇風浪便虬前一鬚不石而住腹中血及膽正黑可以書也世謂烏賊懷墨而知禮江東人取其墨以書契券給人財物書迹如淡墨逾年自消惟空紙耳故俗曰是海君白事小吏或曰古之諸生常自浮水上烏見以爲灰便往啄之乃卷取烏故謂烏化爲之

天牛魚方圓三尺眼大如升在脾頭口在脅中露齒無唇兩肉角如臂兩翼長六尺尾長五尺

石蛭形似龜脚得春雨則生花花似草華

神龜出于江水中廬江郡嘗獻生龜于太卜其含神知爲效之犬

凡蛤之屬開口聞雷鳴不復閉口

潮陽南有水注海濱帶曾山其中多文貝可以解毒

南土謂螭爲蠃甲牡螭出合澗州土人重之語曰得合澗一蠃雖不足豪亦可以高也



新溪蠅味偏其有逆溪溪者

漲海口有蠃每輒相積於背高尺餘如帆乘風而游

鱸魚似魷

鱣音畢

尾上有刺如鱸樹刺也

廣州有人取蝦鬚長四尺

安懷縣有蛭長二尺似小蚌有一小蟹在腹中爲蛭出求食謂之蟹奴郭景純江賦云鰕蛭腹蛭是也

一本云鰕蛭長寸餘大者長二三十寸腹中有子如榆莢合體共生俱爲蛭取食

水弩蛭四月初日上弩射人影至八月卸弩

開寧縣多蜈蚣大者其皮可以鞣鼓取其肉曝爲脯炙  
于牛肉

一本云綏定縣多吳公其大者能以氣吸蜥蜴一本  
云長數丈能噉牛或遇之則鳴鼓燃火炬以驅逐之  
成陽縣樹多守宮大者能鳴謂之蛤蜊

元嘉元年建安郡山賊百餘人掩破郡治抄掠百姓資  
產子女遂入府庫掠財寶先是郡公養蜂別置一室賊  
破戶忽有蜜蜂數萬頭從衣籠出同時噬螫羣賊身首  
腫痛兩眼盲合先諸所掠皆棄而走蜂飛邀逐賊賊遂

慌懼從間道而遁

兩頭蛇無毒夷人餌之

番禺縣西有江浦通牂牁郡公孫述時大姓龍傳尹董氏與郡功曹謝暹保境爲漢乃遣使從番禺江泰貢光武嘉之竝加褒賞

宋侍中趙倫之碑

沈懷文

君戮力以致誠吐規以會機一鼓則寇騎雲徹殄勳則敬氣霧消

省錄尙書議

沈懷文

沈懷文轉楊州治中從事史時議省錄尚書懷文以爲非宜上議不從

昔天官正紀大典序職載師掌均七府成務所以翼平辰衡經贊邦極故總屬之原著夫官典和統之要昭于國言夏因虞禮有深冢司之則周承殷法無損掌邦之儀用乃調佐王均緝亮帝度而武憲之軌弘正漢廷述章之範崇明魏主雖條錄之名立稱於中代總釐之實不愆於自古比代相沿歷朝罔貳及乎爵以事變級以時改皆興贊之道無害國章八統元任靡或省革按台

輔之職三曰禮典以和邦國以統百官四曰政典以平邦國以正百官鄭康成云冢宰之於庶僚無所不總也考於茲義備於典文詳古準今不宜虛廢

與南郡王義宣書

沈慶之

義宣至潯陽與臧質西下至鵲頭聞所遣徐遺寶賂魯爽於小峴授首相視失色世祖使鎮北大將軍沈慶之送爽首示義宣并與書

僕荷任一方而釁生所統近聊率輕師指往剪撲軍鋒裁交賊爽授首公情契異常或欲相見及其可識猶送

相呈

與王道隆書

王景文

景文爲江州刺史徵爲尚書左僕射領吏部時謂在江州不能潔已與上幸臣王道隆書

吾雖寡於行已庶不負心旣愧殊效誓不上欺明主竊聞有爲其貝錦者云營生乃至巨萬素無此能一旦忽致異術必非平理惟乞平心精檢若此言不虛便宜肆諸市朝以正風俗脫其妄作當賜恩罔昧之由吾踰忝轉深足以致謗念此驚懼何能自測區區所懷不願望

風容貨吾自了不作偷猶如不作賊故以密白想爲申  
啓

吳興藝文補卷之二終

藝文補

卷之五

四十三

宋文